

漢書門		四		
類	號	一八七	函	架
冊	架	二九二		

內閣文庫		漢書
類	號	一八七
冊	架	二九二

內閣文庫	
番號	漢 4287
冊數	12 ( 3 )
函號	274 159

三



春秋左傳

文公

元年春王正月公卽位

二月癸亥日有食之

天王使叔服來會葬

元年春王使內史叔服來會葬公孫敖聞其能相人也見其二子焉叔服曰穀也食子難也收子穀也豐下必有後於魯國

○於是閏三月非禮也先王之正時也履端於始

舉正於中歸餘於終履端於始序則不愆舉正於中民則不惑歸餘於終事則不悖

夏四月丁巳葬我君僖公

夏四月丁巳葬僖公

天王使毛伯來錫公命

王使毛伯衛來賜公命叔孫得臣如周拜

晉侯伐衛

晉文公之季年諸侯朝晉衛成公不朝使孔達侵鄭伐緜訾及匡晉襄公既祥使告于諸侯而

伐衛及南陽先且居曰效尤禍也請君朝王臣從師晉侯朝王于溫先且居胥臣伐衛五月辛酉朔晉師圍戚六月戊戌取之獲孫昭子叔孫得臣如京師

衛人伐晉

衛人使告于陳陳共公曰更伐之我辭之衛孔達帥師伐晉君子以爲古古者越國而謀

秋公孫敖會晉侯于戚

秋晉侯疆戚田故公孫敖會之

叙事簡練描  
寫處有神

春秋左傳

冬十月丁未楚世子商臣弑其君頹

初楚子將以商臣為大子訪諸令尹子上子上  
曰君之齒未也而又多愛黜乃亂也楚國之舉  
恒在少者且是人也蠶目而豺聲恐人也不可  
立也弗聽既又欲立王子職而黜大子商臣商  
臣聞之而未察告其師潘崇曰若之何而察之  
潘崇曰享江芊而勿敬也從之江芊怒曰呼役  
夫宜君王之欲殺女而立職也告潘崇曰信矣  
潘崇曰能事諸乎曰不能能行乎曰不能能行

奇

大事乎曰能冬十月以宮甲圍成王王請食熊  
蹯而死弗聽丁未王縊諡之曰靈不瞑曰成乃  
瞑穆王立以其為大子之室與潘崇使為大師  
且掌環列之尹

公孫敖如齊

穆伯如齊始聘焉禮也凡君即位卿出並聘踐  
脩舊好要結外援好事鄰國以衛社稷忠信卑  
讓之道也忠德之正也信德之固也卑讓德之  
基也

春秋左傳文公

○殺之役晉人既歸秦帥秦大夫及左右皆言於秦伯曰是敗也孟明之罪也必殺之秦伯曰是孤之罪也周芮良夫之詩曰大風有隧貪人敗類聽言則對誦言如醉匪用其良覆俾我悖是貪故也孤之謂矣孤實貪以禍夫子夫子何罪復使為政

二年春王二月甲子晉侯及秦師戰于彭衙秦師敗績

二年春秦孟明視帥師伐晉以報殺之役二月

晉侯禦之先且居將中軍趙衰佐之王官無地御戎狐鞫居為右甲子及秦師戰于彭衙秦師敗績晉人謂秦拜賜之師戰於殺也晉梁弘御戎萊駒為右戰之明日晉襄公縛秦囚使萊駒以戈斬之囚呼萊駒失戈狼曠取戈以斬囚禽之以從公乘遂以為右箕之役先軫黜之而立續簡伯狼曠怒其友曰盍死之曠曰吾未獲死所其友曰吾與女為難曠曰周志有之勇則害上不登於明堂死而不義非勇也共用之謂勇

吾以勇求右無勇而黜亦其所也。謂上不我知。黜而宜。乃知我矣。子姑待之。及彭衙既陳。以其屬馳秦師死焉。晉師從之。大敗秦師。君子謂狼。蹕於是乎。君子詩曰。君子如怒。亂庶遄沮。又曰。王赫斯怒。爰整其旅。怒不作亂。而以從師。可謂君子矣。

○秦伯猶用孟明。孟明增脩國政。重施於民。趙成子言於諸大夫曰。秦師又至。將必辟之。懼而增德。不可當也。詩曰。毋念爾祖。聿脩厥德。孟明念

之矣。念德不忘。其可敵乎。

丁丑作僖公主

丁丑作僖公主書不時也。

三月乙巳及晉處父盟

晉人以公不朝來討。公如晉。夏四月己巳。晉人使陽處父盟。公以恥之。書曰。及晉處父盟。以厭之也。適晉不書諱之也。

隴 夏六月公孫敖會宋公陳侯鄭伯晉士穀盟于垂

公未至六月穆伯會諸侯及晉司空士穀盟于  
垂隴晉討衛故也書士穀堪其事也陳侯為衛  
請成于晉執孔達以說

自十有二月不雨至于秋七月

八月丁卯大事于大廟躋僖公

秋八月丁卯大事于大廟躋僖公逆祀也於是  
夏父弗忌為宗伯尊僖公且明見曰吾見新鬼  
大故鬼小先大後小順也躋聖賢明也明順禮  
也君子以為失禮禮無不順祀國之大事也而

取義巧而淺  
小若出近代  
乎人必以嫩  
病之

逆之可謂禮乎子雖齊聖不先父食久矣故禹  
不先鯀湯不先契文武不先不窋宋祖帝乙鄭  
祖厲王猶上祖也是以魯頌曰春秋匪解享祀  
不忒皇皇后帝皇祖后稷君子曰禮謂其后稷  
親而先帝也詩曰問我諸姑遂及伯姊君子曰  
禮謂其姊親而先姑也仲尼曰臧文仲其不仁  
者三不知者三下展禽廢六關妾織蒲三不仁  
也作虛器縱逆祀祀爰居三不知也

冬晉人宋人陳人鄭人伐秦

冬晉先且居宋公子成陳轅選鄭公子歸生伐秦取汪及彭衙而還以報彭衙之役卿不書為穆公故尊秦也謂之崇德

公子遂如齊納幣

襄仲如齊納幣禮也凡君即位好舅甥脩昏姻娶元妃以奉粢盛孝也孝禮之始也

三年春王正月叔孫得臣會晉人宋人陳人衛人鄭人伐沈沈潰

三年春莊叔會諸侯之師伐沈以其服於楚也

沈潰凡民逃其上曰潰在上曰逃

○衛侯如陳拜晉成也

夏五月王子虎卒

夏四月乙亥王叔文公卒來赴弔如同盟禮也

秦人伐晉

秦伯伐晉濟河焚舟取王官及郊晉人不出遂自茅津濟封穀尸而還遂霸西戎用孟明也君子是以知秦穆公之為君也舉人之周也與人之壹也孟明之臣也其不解也能懼思也子桑

九也字法見  
態一雙二  
單亦不板  
亦有章句法



第畦徑大明  
故之甚易所  
以不為高妙

春秋左傳

之忠也其知人也能舉善也詩曰于以采蘩于  
沼于沚于以用之公侯之事秦穆有焉夙夜匪  
解以事一人孟明有焉詒厥孫謀以燕翼子子  
桑有焉

秋楚人圍江

雨蝨于宋

秋雨蝨于宋隊而死也

○楚師圍江晉先僕伐楚以救江

冬公如晉十有二月己巳公及晉侯盟

晉人懼其無禮於公也請改盟公如晉及晉侯  
盟晉侯饗公賦菁菁者莪莊叔以公降拜曰小  
國受命於大國敢不慎儀君貺之以大禮何樂  
如之抑小國之樂大國之惠也晉侯降辭登成  
拜公賦嘉樂

晉陽處父帥師伐楚以救江

冬晉以江故告于周王叔桓公晉陽處父伐楚  
以救江門于方城遇息公子朱而還

四年春公至自晉

春秋左傳文公

○四年春晉人歸孔達于衛以為衛之良也故免之夏衛侯如晉拜

○曹伯如晉會正

夏逆婦姜于齊

逆婦姜于齊卿不行非禮也君子是以知出姜之不允於魯也曰貴聘而賤逆之君而卑之立而廢之弃信而壞其主在國必亂在家必亡不允宜哉詩曰畏天之威于時保之敬主之謂也狄侵齊

秋楚人滅江

晉侯伐秦

秋晉侯伐秦圍邠新城以報王官之役

○楚人滅江秦伯為之降服出次不舉過數大夫諫公曰同盟滅雖不能救敢不矜乎吾自懼也君子曰詩云惟彼二國其政不獲惟此四國爰救爰度其秦穆之謂矣

衛侯使甯俞來聘

衛甯武子來聘公與之宴為賦湛露及彤弓不

善出脫

春秋左傳

辭又不荅賦使行人私焉對曰臣以為肄業及之也昔諸侯朝正於王王宴樂之於是乎賦湛露則天子當陽諸侯用命也諸侯敵王所愾而獻其功王於是乎賜之彤弓一彤矢百茲弓矢千以覺報宴今陪臣來繼舊好君辱貺之其敢干大禮以自取戾

冬十有一月壬寅夫人風氏薨

冬成風薨

五年春王正月王使榮叔歸舍且贈 三月辛亥

葬我小君成風 王使召伯來會葬

五年春王使榮叔來舍且贈召昭公來會葬禮也

夏公孫敖如晉

秦人入郟

初郟叛楚即秦又貳於楚夏秦人入郟

秋楚人滅六

六人叛楚即東夷秋楚成大心仲歸帥師滅六

冬楚公子燮滅蓼臧文仲聞六與蓼滅曰臯陶

春秋左傳 文公

庭堅不祀忽諸德之不建民之無援哀哉

冬十月甲申許男業卒

○晉陽處父聘于衛反過甯甯嬴從之及溫而還其妻問之嬴曰以剛商書曰沈漸剛克高明柔克夫子壹之字法其不没乎天為剛德猶不干時況在人乎且華而不實怨之所聚也犯而聚怨不可以定身余懼不獲其利而離其難是以去之

○晉趙成子欒貞子霍伯白季皆卒

六年春葬許僖公

○六年春晉蒐于夷舍二軍使狐射姑將中軍趙盾佐之陽處父至自溫改蒐于董易中軍陽子成季之屬也故黨於趙氏且謂趙盾能曰使能國之利也是以上之宣子於是乎始為國政制事典正法罪辟獄刑董逋逃由質要治舊滂本秩禮續常職出滯淹既成以授大傅陽子與大師賈佗使行諸晉國以為常法

夏季孫行父如陳

臧文仲以陳衛之睦也欲求好於陳夏季文子

聘于陳且娶焉

樹過風則鳴故云樹之風聲十句亦太排第猶有佳字然在今則為

○秦伯任好卒以子車氏之三子奄息仲行鍼虎為殉皆秦之良也國人哀之為之賦黃鳥君子曰秦穆之不為盟主也宜哉死而弃民先王違世猶詒之法而況奪之善人乎詩曰人之云亡邦國殄瘁無善人之謂若之何奪之古之王者知命之不長是以竝建聖哲樹之風聲分之采物著之話言為之律度陳之藝極引之表儀予之法制告之訓典教之防利委之常秩道之以

老生常談

此是未見秦強時語

禮則使母失其土宜眾隸賴之而後即命聖王同之今縱無法以遺後嗣而又收其良以死難以在上矣君子是以知秦之不復東征也

秋季孫行父如晉

秋季文子將聘於晉使求遭喪之禮以行其人曰將焉用之文子曰備豫不虞古之善教也求而無之實難過求何害

八月乙亥晉侯驩卒

八月乙亥晉襄公卒靈公少晉人以難故欲立

長君趙孟曰立公子雍好善而長先君愛之且近於秦秦舊好也置善則固事長則順立愛則孝結舊則安為難故故欲立長君有此四德者難必抒矣賈季曰不如立公子樂辰嬴嬖於二君立其子民必安之趙孟曰辰嬴賤班在九人其子何震之有且為二嬖淫也為先君子不能求大而出在小國辟也母淫子辟無威陳小而遠無援將何安焉杜祁以君故讓偪姑而上之以狄故讓季隗而已次之故班在四先君是以

愛其子而仕諸秦為亞卿焉秦大而近足以為援母義子愛足以威民立之不亦可乎使先蔑士會如秦逆公子雍賈季亦使召公子樂于陳趙孟使殺諸郟

○賈季怨陽子之易其班也而知其無援於晉也九月賈季使續鞫居殺陽處父書曰晉殺其大夫侵官也

冬十月公子遂如晉葬晉襄公  
冬十月襄仲如晉葬襄公

晉殺其大夫陽處父

晉狐射姑出奔狄

十一月丙寅晉殺續簡伯賈季奔狄宣子使史駢送其帑夷之蒐賈季戮史駢史駢之人欲盡殺賈氏以報焉史駢曰不可吾聞前志有之曰敵惠敵怨不在後嗣忠之道也夫子禮於賈季我以其寵報私怨無乃不可乎介人之寵非勇也損怨益仇非知也以私害公非忠也釋此三者何以事夫子盡具其帑與其器用財賄親帥

扞之送致諸竟

閏月不告月猶朝于廟

閏月不告朔非禮也閏以正時時以作事事以厚生生民之道於是乎在矣不告閏朔弃時政也何以爲民

七年春公伐邾三月甲戌取須句

七年春公伐邾閏晉難也三月甲戌取須句宣文公子焉非禮也

遂城郟

夏四月宋公王臣卒 宋人殺其大夫

夏四月宋成公卒於是公子成爲右師公孫友爲左師樂豫爲司馬鱗矐爲司徒公子蕩爲司城華御事爲司寇昭公將去羣公子樂豫曰不可公族公室之枝葉也若去之則本根無所庇廕矣葛藟猶能庇其本根故君子以爲比況國君乎此諺所謂庇焉而縱尋斧焉者也必不可君其圖之親之以德皆股肱也誰敢攜貳若之何去之不聽穆襄之族率國人以攻公殺公孫

固公孫鄭于公宮六卿和公室樂豫舍司馬以讓公子邛昭公卽位而葬書曰宋人殺其大夫不稱名衆也且言非其罪也

戊子晉人及秦人戰于令狐晉先蔑奔秦

秦康公送公子雍于晉曰文公之入也無衛故有呂卻之難乃多與之徒衛穆嬴日抱大子以啼于朝曰先君何罪其嗣亦何罪舍適嗣不立而外求君將焉寘此出朝則抱以適趙氏頓首於宣子曰先君奉此子也而屬諸子曰此子也

屬而正

婉以深



才吾受子之賜不才吾唯子之怨今君雖終言言已陳猶在耳而弃之若何宣子與諸大夫皆患穆嬴且畏偪乃背先蔑而立靈公以禦秦師箕鄭居守趙盾將中軍先克佐之荀林父佐上軍先蔑將下軍先都佐之步招御戎戎津為右及董陰宣子曰我若受秦秦則賓也不受寇也既不受矣而復緩師秦將生心先人有奪人之心軍之善謀也逐寇如追逃軍之善政也訓卒利兵秣馬蓐食潛師夜起戊子敗秦師于令狐至于刳

首己丑先蔑奔秦士會從之先蔑之使也荀林父止之曰夫人大子猶在而外求君此必不行子以疾辭若何不然將及攝卿以往可也何必子同官為寮吾嘗同寮敢不盡心乎弗聽為賦板之三章又弗聽及亡荀伯盡送其帑及其器用財賄於秦曰為同寮故也士會在秦三年不見士伯其人曰能亡人於國不能見於此焉用之士季曰吾與之同罪非義之也將何見焉及歸遂不見

動 隋

狄侵我西鄙

狄侵我西鄙公使告于晉趙宣子使因賈季問  
豐舒且讓之豐舒問於賈季曰趙衰趙盾孰賢  
對曰趙衰冬日之日也趙盾夏日之日也

秋八月公會諸侯晉大夫盟于扈

秋八月齊侯宋公衛侯陳侯鄭伯許男曹伯會  
晉趙盾盟于扈晉侯立故也公後至故不書所  
會凡會諸侯不書所會後也後至不書其國辟  
不敏也

語精峭意尤  
深妙

冬徐伐莒

公孫敖如莒涖盟

穆伯娶于莒曰戴已生文伯其娣聲已生惠叔  
戴已卒又聘于莒莒人以聲已辭則為襄仲聘  
焉冬徐伐莒莒人來請盟穆伯如莒涖盟且為  
仲逆及鄆陵登城見之美自為娶之仲請攻之  
公將許之叔仲惠伯諫曰臣聞之兵作於內為  
亂於外為寇寇猶及人亂自及也今臣作亂而  
君不禁以啟寇讐若之何公止之惠伯成之使  
仲舍之公孫敖反之復為兄弟如初從之

九之字法

宜入下年

連四何以法

逆叙法

春秋左傳

○晉卻缺言於趙宣子曰日衛不睦故取其地今已睦矣可以歸之叛而不討何以示威服而不柔何以示懷非威非懷何以示德無德何以主盟子爲正卿以主諸侯而不務德將若之何夏書曰戒之用休董之用威勸之以九歌勿使壞九功之德皆可歌也謂之九歌六府三事謂之九功水火金木土穀謂之六府正德利用厚生謂之三事義而行之謂之德禮無禮不樂所由叛也若吾子之德莫可歌也其誰來之益使睦

者歌吾子乎宣子說之

八年春王正月

○八年春晉侯使解揚歸匡戚之田于衛且復致公壻池之封自申至于虎牢之竟

夏四月

○夏秦人伐晉取武城以報令狐之役

秋八月戊申天王崩

秋襄王崩

冬十月壬午公子遂會晉趙盾盟于衡雍

乙酉

春秋左傳文公

十八

公子遂會雒戎盟于暴

晉人以扈之盟來討冬襄仲會晉趙孟盟于衡  
雍報扈之盟也遂會伊雒之戎書曰公子遂字法  
之也

公孫敖如京師不至而復丙戌奔莒

穆伯如周弔喪不至以幣奔莒從已氏焉

各

宋人殺其大夫司馬宋司城來奔

宋襄夫人襄王之姊也昭公不禮焉夫人因戴

氏之族以殺襄公之孫孔叔公孫鍾離及大司  
馬公子卬皆昭公之黨也司馬握節以死故書  
以官司城蕩意諸來奔效節於府人而出公以  
其官逆之皆復之亦書以官皆貴之也

○夷之蒐晉侯將登箕鄭父先都而使士穀梁益  
耳將中軍先克曰狐趙之勲不可廢也從之先  
克奪蒯得田于董陰故箕鄭父先都士穀梁益  
耳蒯得作亂

九年

○九年春王正月己酉使賊殺先克乙丑晉人殺先都梁益耳

春毛伯來求金

毛伯衛來求金非禮也不書王命未葬也

夫人姜氏如齊

二月叔孫得臣如京師辛丑葬襄王

二月莊叔如周葬襄王

晉人殺其大夫先都

三月夫人姜氏至自齊

晉人殺其大夫士穀及箕鄭父

三月甲戌晉人殺箕鄭父士穀蒯得

楚人伐鄭公子遂會晉人宋人衛人許人救鄭

范山言於楚子曰晉君少不在諸侯北方可圖

也楚子師于狼淵以伐鄭囚公子堅公子尤及

樂耳鄭及楚平公子遂會晉趙盾宋華耦衛孔

達許大夫救鄭不及楚師卿不書緩也以懲不

恪

夏狄侵齊

○夏楚侵陳克壺丘以其服於晉也

秋八月曹伯襄卒

○秋楚公子朱自東夷伐陳陳人敗之獲公子茂

陳懼乃及楚平

九月癸酉地震

冬楚子使椒來聘

冬楚子越椒來聘執幣傲叔仲惠伯曰是必滅

若敖氏之宗傲其先君神弗福也

秦人來歸僖公成風之襚

秦人來歸僖公成風之襚禮也諸侯相弔賀也

雖不當事苟有禮焉書也以無忘舊好

葬曹共公

十年春王三月辛卯臧孫辰卒

○十年春晉人伐秦取少梁

夏秦伐晉

夏秦伯伐晉取北徵

楚殺其大夫宜申

初楚范巫裔似謂成王與子玉子西曰三君皆

將強死城濮之役王思之故使止子玉曰母死不及止子西子西縊而縣絕王使適至遂止之使為商公沿漢泝江將入郢王在渚宮下見之懼而辭曰臣免於死又有讒言謂臣將逃臣歸死於司敗也王使為工尹又與子家謀弑穆王穆王聞之五月殺鬬宜申及仲歸

自正月不雨至于秋七月

及蘇子盟于女栗

秋七月及蘇子盟于女栗頃王立故也

冬狄侵宋

楚子蔡侯次于厥貉

陳侯鄭伯會楚子于息冬遂及蔡侯次于厥貉將以伐宋宋華御事曰楚欲弱我也先為之弱乎何必使誘我我實不能民何罪乃逆楚子勞且聽命遂道以田孟諸宋公為右孟鄭伯為左孟期思公復遂為右司馬子朱及文之無畏為左司馬命夙駕載燧宋公違命無畏扶其僕以徇或謂子舟曰國君不可戮也子舟曰當官而

二句宜入下  
年

行何疆之有詩曰剛亦不吐柔亦不茹毋縱詭  
 隨以謹罔極是亦非辟疆也敢愛死以亂官乎  
 ○厥貉之會麋子逃歸  
 十有一年春楚子伐麋  
 十一年春楚子伐麋成大心敗麋師於防渚潘  
 崇復伐麋至于錫穴  
 夏叔仲彭生會晉卻缺于承匡  
 夏叔仲惠伯會晉卻缺于承匡謀諸侯之從於  
 楚者

秋曹伯來朝

秋曹文公來朝即位而來見也

公子遂如宋

襄仲聘于宋且言司城蕩意諸而復之因賀楚  
 師之不害也

狄侵齊 冬十月甲午叔孫得臣敗狄于鹹

鄭瞞侵齊遂伐我公卜使叔孫得臣追之吉侯  
 叔夏御莊叔繇房甥為右富父終甥駟乘冬十  
 月甲午敗狄于鹹獲長狄僑如富父終甥椿其



喉以戈殺之埋其首於子駒之門以命宣伯初  
宋武公之世鄭瞞伐宋司徒皇父帥師禦之彫  
班御皇父充石公子穀甥為右司寇牛父駟乘  
以敗狄于長丘獲長狄緣斯皇父之二子死焉  
宋公於是以門賞彫班使食其征謂之彫門晉  
之滅潞也獲僑如之弟焚如齊襄公之二年鄭  
瞞伐齊齊王子成父獲其弟榮如埋其首於周  
首之北門衛人獲其季弟簡如鄭瞞由是遂亡  
○邾大夫朱儒自安於夫鍾國人弗徇

十有二年春王正月邾伯來奔

十二年春邾伯卒邾人立君大夫以夫鍾與邾  
邾來奔公以諸侯逆之非禮也故書曰邾伯來  
奔不書地尊諸侯也

杞伯來朝

杞桓公來朝始朝公也且請絕叔姬而無絕昏  
公許之

二月庚子子叔姬卒

二月叔姬卒不言杞絕也書叔姬言非女也

夏楚人圍巢

楚令尹大孫伯卒成嘉為令尹羣舒叛楚夏子孔執舒子平及宗子遂圍巢

秋滕子來朝

秋滕昭公來朝亦始朝公也

秦伯使術來聘

秦伯使西乞術來聘且言將伐晉襄仲辭玉曰君不忘先君之好照臨魯國鎮撫其社稷重之以大器寡君敢辭玉對曰不腆敝器不足辭也

辭命

主人三辭賓荅曰寡君願徼福于周公魯公以事君不腆先君之敝器使下臣致諸執事以為瑞節要結好命所以藉寡君之命結二國之好是以敢致之襄仲曰不有君子其能國乎國無陋矣厚賄之

冬十有二月戊午晉人秦人戰于河曲

秦為令狐之役故冬秦伯伐晉取羈馬晉人禦之趙盾將中軍荀林父佐之卻缺將上軍臾駢佐之欒盾將下軍胥甲佐之范無恤御戎以從

敘事鍊核

秦師于河曲。史駢曰：秦不能久，請深壘固軍，以待之。從之。秦人欲戰，秦伯謂士會曰：「若何而戰？」對曰：「趙氏新出其屬，曰史駢，必實為此謀。將以老我師也。趙有側室，曰穿，晉君之壻也。有寵而弱，不在軍事，好勇而狂，且惡史駢之佐上軍也。若使輕者肆焉，其可？」秦伯以璧祈戰于河。十二月戊午，秦軍掩晉上軍。趙穿追之不及，反怒，曰：「裹糧坐甲，固敵是求。敵至不擊，將何俟焉？」軍吏曰：「將有待也。」穿曰：「我不知謀，將獨出，乃以其屬。」

正可與晉重  
而言廿作對

出。宣子曰：「秦獲穿也，獲一卿矣。」秦以勝歸，我何以報？乃皆出戰。交綏。秦行人夜戒晉師曰：「兩君之士皆未憇也，明日請相見也。」史駢曰：「使者目動而言，肆懼我也。將遁矣。薄諸河，必敗之。」胥甲趙穿當軍門，呼曰：「死傷未收而棄之，不惠也。不待期而薄人於險，無勇也。」乃止。秦師夜遁，復侵晉入瑕。

季孫行父帥師城諸及鄆  
城諸及鄆書時也

春秋左傳

十有三年春王正月

○十三年春晉侯使詹嘉處瑕以守桃林之塞

夏五月壬午陳侯朔卒

○晉人患秦之用士會也夏六卿相見於諸浮趙  
宣子曰隨會在秦賈季在狄難日至矣若之何  
中行桓子曰請復賈季能外事且由舊勲卻成  
子曰賈季亂且罪大不如隨會能賤而有恥柔  
而不犯其知足使也且無罪乃使魏壽餘偽以  
魏叛者以誘士會執其帑於晉使夜逸請自歸

志

有境

用備謂策是  
書札近是

于秦秦伯許之履士會之足於朝秦伯師于河  
西魏人在東壽餘曰請東人之能與夫二三有  
司言者吾與之先使士會士會辭曰晉人虎狼  
也若背其言臣死妻子為戮無益於君不可悔  
也秦伯曰若背其言所不歸爾帑者有如河乃  
行繞朝贈之以策曰子無謂秦無人吾謀適不  
用也既濟魏人謀而還秦人歸其帑其處者為  
劉氏

邾子蘧蒢卒

春秋左傳 文公

邾文公卜遷于繹史曰利於民而不利於君邾子曰苟利於民孤之利也天生民而樹之君以利之也民既利矣孤必與焉左右曰命可長也君何弗爲邾子曰命在養民死之短長時也民苟利矣遷也吉莫如之遂遷于繹五月邾文公卒君子曰知命

自正月不雨至于秋七月

大室屋壞

秋七月大室之屋壞書不共也

冬公如晉衛侯會公于沓

狄侵衛

十有二月己丑公及晉侯盟公還自晉鄭伯會公于棐

冬公如晉朝且尋盟衛侯會公于沓請平于晉公還鄭伯會公于棐亦請平于晉公皆成之鄭伯與公宴于棐子家賦鴻鴈季文子曰寡君未免於此文子賦四月子家賦載馳之四章文子賦采薇之四章鄭伯拜公荅拜

十有四年春王正月公至自晉

○十四年春頃王崩周公閱與王孫蘇爭政故不赴凡崩薨不赴則不書禍福不告亦不書懲不敬也

邾人伐我南鄙叔彭生帥師伐邾

邾文公之卒也公使弔焉不敬邾人來討伐我南鄙故惠伯伐邾

夏五月乙亥齊侯潘卒

子叔姬妃齊昭公生舍叔姬無寵舍無威公子

向無奇然亦嚴栗

商人驟施於國而多聚士盡其家貸於公有司以繼之夏五月昭公卒舍即位

○邾文公元妃齊姜生定公二妃晉姬生捷菑文公卒邾人立定公捷菑奔晉

六月公會宋公陳侯衛侯鄭伯許男曹伯晉趙盾癸酉同盟于新城

六月同盟于新城從於楚者服且謀邾也

○秋七月乙卯夜齊商人弑舍而讓元元曰爾求之久矣我能事爾爾不可使多蓄憾將免我乎

勁妙有姿態

爾爲之

秋七月有星孛入于北斗

有星孛入于北斗周內史叔服曰不出七年宋

齊晉之君皆將死亂

公至自會

晉人納捷菑于邾弗克納

晉趙盾以諸侯之師八百乘納捷菑于邾邾人

辭曰齊出矍且長宣子曰辭順而弗從不祥乃

還

○周公將與王孫蘇訟于晉王叛王孫蘇而使尹

氏與聃啟訟周公于晉趙宣子平王室而復之

○楚莊王立子孔潘崇將襲羣舒使公子燮與子

儀守而伐舒蓼二子作亂城郢而使賊殺子孔

不克而還八月二子以楚子出將如商密廬戢

黎及叔麋誘之遂殺鬬克及公子燮初鬬克囚

于秦秦有殺之敗而使歸求成成而不得志公

子燮求令尹而不得故二子作亂

九月甲申公孫敖卒于齊

穆伯之從已氏也魯人立文伯穆伯生二子於  
莒而求復文伯以為請襄仲使無朝聽命復而  
不出三年而盡室以復適莒文伯疾而請曰穀  
之子弱請立難也許之文伯卒立惠叔穆伯請  
重賂以求復惠叔以為請許之將來九月卒于  
齊告喪請葬弗許

齊公子商人弑其君舍

齊人定懿公使來告難故書以九月齊公子元  
不順懿公之為政也終不曰公曰夫已氏

宋子哀來奔

宋高哀為蕭封人以為卿不義宋公而出遂來  
奔書曰宋子哀來奔貴之也

冬單伯如齊齊人執單伯 齊人執子叔姬

襄仲使告于王請以王寵求昭姬于齊曰殺其  
子焉用其母請受而罪之 單伯如齊請子叔  
姬齊人執之又執子叔姬

十有五年春季孫行父如晉  
十五年春季文子如晉為單伯與子叔姬故也



三月宋司馬華孫來盟

三月宋華耦來盟其官皆從之書曰宋司馬華孫貴之也公與之宴辭曰君之先臣督得罪於宋殤公名在諸侯之策臣承其祀其敢辱君請承命於亞旅魯人以為敏

夏曹伯來朝

夏曹伯來朝禮也諸侯五年再相朝以脩王命古之制也

齊人歸公孫敖之喪

齊人或為孟氏謀曰魯爾親也飾棺寘諸堂阜魯必取之從之卞人以告惠叔猶毀以為請立於朝以待命許之取而殯之齊人送之書曰齊人歸公孫敖之喪為孟氏且國故也葬視共仲聲已不視帷堂而哭襄仲欲勿哭惠伯曰喪親之終也雖不能始善終可也史佚有言曰兄弟致美救乏賀善弔災祭敬喪哀情雖不同毋絕其愛親之道也子無失道何怨於人襄仲說帥兄弟以哭之他年其二子來孟獻子愛之聞於

國或譖之曰將殺子獻子以告季文子二子曰夫子以愛我聞我以將殺子聞不亦遠於禮乎遠禮不如死一人門于句窺一人門于戾丘皆死

六月辛丑朔日有食之鼓用牲于社

六月辛丑朔日有食之鼓用牲于社非禮也日有食之天子不舉伐鼓于社諸侯用幣于社伐鼓于朝以昭事神訓民事君示有等威古之道也

單伯至自齊

齊人許單伯請而赦之使來致命書曰單伯至自齊貴之也

晉卻缺帥師伐蔡戊申入蔡

新城之盟蔡人不與晉卻缺以上軍下軍伐蔡曰君弱不可以怠戊申入蔡以城下之盟而還凡勝國曰滅之獲大城焉曰入之

秋齊人侵我西鄙季孫行父如晉

秋齊人侵我西鄙故季文子告于晉

冬十有一月諸侯盟于扈

冬十一月晉侯宋公衛侯蔡侯陳侯鄭伯許男曹伯盟于扈尋新城之盟且謀伐齊也齊人賂晉侯故不克而還於是齊難是以公不會書曰諸侯盟于扈無能為故也凡諸侯會公不與不書諱君惡也與而不書後也

十有二月齊人來歸子叔姬

齊人來歸子叔姬王故也

齊侯侵我西鄙遂伐曹入其郛

章法亦好

左氏每有此重法後是申前味最長

齊侯侵我西鄙謂諸侯不能也遂伐曹入其郛討其來朝也季文子曰齊侯其不免乎已則無禮而討於有禮者曰女何故行禮禮以順天天之道也重法已則反天而又以討人難以免矣詩曰胡不相畏不畏于天君子之不虐幼賤畏于天也在周頌曰畏天之威于時保之不畏于天將何能保以亂取國奉禮以守猶懼不終多行無禮弗能在矣

十有六年春季孫行父會齊侯于陽穀齊侯弗及

盟

十六年春王正月及齊平公有疾使季文子會齊侯于陽穀請盟齊侯不肯曰請俟君閒

夏五月公四不視朔

夏五月公四不視朔疾也

六月戊辰公子遂及齊侯盟于鄆丘

公使襄仲納賂于齊侯故盟于鄆丘

秋八月辛未夫人姜氏薨 毀泉臺

有蛇自泉宮出入于國如先君之數秋八月辛

恤事

簡而核

未聲姜薨毀泉臺

楚人秦人巴人滅庸

楚大饑戎伐其西南至于阜山師于大林又伐其東南至于陽丘以侵訾枝庸人帥羣蠻以叛楚麋人率百濮聚於選將伐楚於是申息之北門不啟楚人謀徙於阪高蔣賈曰不可我能往寇亦能往不如伐庸夫麋與百濮謂我饑不能師故伐我也若我出師必懼而歸百濮離居將各徙其邑誰暇謀人乃出師旬有五日百濮乃

是質語以調鍊故不覺其質

亦是以鍊文  
其質

罷自廬以往振廩同食次于句瀝使廬戢黎侵庸及庸方城庸人逐之囚子揚窻三宿而逸曰庸師衆羣蠻聚焉不如復大師且起王卒合而後進師叔曰不可姑又與之遇以驕之彼驕我怒而後可克先君蚡冒所以服陘隰也又與之遇七遇皆北唯裨僚魚人實逐之庸人曰楚不足與戰矣遂不設備楚子乘驛會師于臨品分為二隊子越自石溪子貝自仞以伐庸秦人巴人從楚師羣蠻從楚子盟遂滅庸

冬十有一月宋人弑其君杵臼

宋公子鮑禮於國人宋饑竭其粟而貸之年自

七十以上無不饋詒也時加羞珍異無日不數

於六卿之門國之材人無不事也親自桓以下

無不恤也公子鮑美而豔襄夫人欲通之而不

可乃助之施昭公無道國人奉公子鮑以因夫

人於是華元為右師公孫友為左師華耦為司

馬鱗矐為司徒蕩意諸為司城公子朝為司寇

初司城蕩卒公孫壽辭司城請使意諸為之既

而告人曰君無道吾官近懼及焉弃官則族無所庇子身之貳也姑紆死焉雖亡子猶不亡族既夫人將使公田孟諸而殺之公知之盡以寶行蕩意諸曰盍適諸侯公曰不能其大夫至于君祖母以及國人諸侯誰納我且既為人君而又為人臣不如死盡以其寶賜左右而使行人使謂司城去公對曰臣之而逃其難若後君何冬十一月甲寅宋昭公將田孟諸未至夫人王姬使帥甸攻而殺之蕩意諸死之書曰宋人

弑其君杵臼君無道也文公即位使母弟須爲司城華耦卒而使蕩虺爲司馬十有七年春晉人衛人陳人鄭人伐宋十七年春晉荀林父衛孔達陳公孫寧鄭石楚伐宋討曰何故弑君猶立文公而還卿不書失其所也

夏四月癸亥葬我小君聲姜

夏四月癸亥葬聲姜有齊難是以緩

齊侯伐我西鄙六月癸未公及齊侯盟于穀

齊侯伐我北鄙襄仲請盟六月盟于穀諸侯會于扈

晉侯蒐于黃父遂復合諸侯于扈平宋也公不與會齊難故也書曰諸侯無功也於是晉侯不見鄭伯以為貳於楚也鄭子家使執訊而與之書以告趙宣子曰寡君即位三年召蔡侯而與之事君九月蔡侯入于敝邑以行敝邑以侯宣多之難寡君是以不得與蔡侯偕十一月克滅侯宣多而隨蔡侯以朝于執事十二年六月歸

辭命

妙處乃只在敘事換文法上此等文字古今亦罕二

總上意錯落流動

生佐寡君之嫡夷以請陳侯于楚而朝諸君十四年七月寡君又朝以歲陳事十五年五月陳侯自敝邑往朝于君往年正月燭之武往朝夷也八月寡君又往朝以陳蔡之密邇於楚而不敢貳焉則敝邑之故也雖敝邑之事君何以不免在位之中一朝于襄而再見于君夷與孤之二三臣相及於絳雖我小國則蔑以過之矣今大國曰爾未逞吾志敝邑有亡無以加焉古人有言曰畏首畏尾身其餘幾又曰鹿死不擇音

調好鍊法抄

餘波

正理實論

小國之事大國也。德則其人也，不德則其鹿也。鋌而走險，急何能擇命之罔極，亦知亡矣。將悉敝賦以待於儵，唯執事命之。文公二年六月壬申，朝于齊。四年二月壬戌，為齊侵蔡，亦獲成於楚。居大國之間而從於彊，令豈其罪也。大國若弗圖，無所逃命。晉鞏朔行成於鄭，趙穿公壻池為質焉。

秋公至自穀。

○秋周甘歎敗戎于邠，垂乘其飲酒也。

○冬十月鄭太子夷石楚為質于晉。

冬公子遂如齊。

襄仲如齊拜穀之盟，復曰：臣聞齊人將食魯之麥，以臣觀之，將不能齊君之語。偷臧文仲有言曰：民主偷必死。

十有八年春，王二月丁丑，公薨于臺下。

十八年春，齊侯戒師期而有疾，醫曰：不及秋將死。公聞之，卜曰：尚無及期。惠伯令龜，卜楚丘占之曰：齊侯不及期，非疾也。君亦不聞，令龜有咎。

春秋左傳 文公



二月丁丑公薨

秦伯瑩卒

夏五月戊戌齊人弑其君商人

齊懿公之為公子也與邴歆之父爭田弗勝及即位乃掘而刖之而使歆僕納閭職之妻而使職驂乘夏五月公游于申池二人浴于池歆以扑扶職職怒歆曰人奪女妻而不怒一扶女庸何傷職曰與刖其父而弗能病者何如乃謀弑懿公納諸竹中歸舍爵而行齊人立公子元

六月癸酉葬我君文公

六月葬文公

秋公子遂叔孫得臣如齊

秋襄仲莊叔如齊惠公立故且拜葬也

冬十月子卒

文公二妃敬嬴生宣公敬嬴嬖而私事襄仲宣公長而屬諸襄仲襄仲欲立之叔仲不可仲見于齊侯而請之齊侯新立而欲親魯許之冬十月子卒諱之也仲

以君命召惠伯其宰公冉務人止之曰入必死  
叔仲曰死君命可也公冉務人曰若君命可死  
非君命何聽弗聽乃入殺而埋之馬矢之中公  
冉務人奉其帑以奔蔡既而復叔仲氏  
夫人姜氏歸于齊

夫人姜氏歸于齊大歸也將行哭而過市曰天  
乎仲為不道殺嫡立庶市人皆哭魯人謂之哀  
姜

季孫行父如齊

莒弒其君庶其

平鋪之文太  
板而實之跌  
宕流走之趣  
不為佳

莒紀公生大子僕又生季佗愛季佗而黜僕且  
多行無禮於國僕因國人以弒紀公以其寶玉  
來奔納諸宣公公命與之邑曰今日必授季文  
子使司寇出諸竟曰今日必達公問其故季文  
子使大史克對曰先大夫臧文仲教行父事君  
之禮行父奉以周旋弗敢失隊曰見有禮於其  
君者事之如孝子之養父母也見無禮於其君  
者誅之如鷹鷂之逐鳥雀也先君周公制周禮

曰則以觀德德以處事事以度功功以食民作  
誓命曰毀則爲賊掩賊爲藏竊賄爲盜盜器爲  
姦王藏之名賴姦之用爲大凶德有常無赦在  
九刑不忘行父還觀莒僕莫可則也孝敬忠信  
爲吉德盜賊藏姦爲凶德夫莒僕則其孝敬則  
弑君父矣則其忠信則竊寶玉矣其人則盜賊  
也其器則姦兆也保而利之則王藏也以訓則  
昏民無則焉不度於善而皆在於凶德是以去  
之昔高陽氏有才子八人蒼舒隤斨檮戴大臨

危降庭堅仲容叔達齊聖廣淵明允篤誠天下  
之民謂之八愷高辛氏有才子八人伯奮仲堪  
叔獻季仲伯虎仲熊叔豹季狸忠肅共懿宣慈  
惠和天下之民謂之八元此十六族也世濟其  
美不隕其名以至於堯堯不能舉舜臣堯舉八  
愷使主后土以揆百事莫不時序地平天成舉  
八元使布五教于四方父義母慈兄友弟共子  
孝內平外成昔帝鴻氏有不才子掩義隱賊好  
行凶德醜類惡物頑嚚不友是與比周天下之

民謂之渾敦少皞氏有不才子毀信廢忠崇飾  
惡言靖譖庸回服讒蒐慝以誣盛德天下之民  
謂之窮奇顓頊氏有不才子不可教訓不知話  
言告之則頑舍之則嚚傲很明德以亂天常天  
下之民謂之嚚杌此三族也世濟其凶增其惡  
名以至于堯堯不能去緡雲氏有不才子貪于  
飲食冒于貨賄侵欲崇侈不可盈厭聚斂積實  
不知紀極不分孤寡不恤窮匱天下之民以比  
三凶謂之饕餮舜臣堯賓于四門流四凶族渾

敦窮奇嚚杌饕餮投諸四裔以禦魘魅是以堯  
崩而天下如一同心戴舜以為天子以其舉十  
六相去四凶也故虞書數舜之功曰慎徽五典  
五典克從無違教也曰納于百揆百揆時序無  
廢事也曰賓于四門四門穆穆無凶人也舜有  
大功二十而為天子今行父雖未獲一吉人去  
一凶矣於舜之功二十之一也庶幾免於戾乎  
○宋武氏之族道昭公子將奉司城須以作亂十  
二月宋公殺母弟須及昭公子使戴莊桓之族

攻武氏於司馬子伯之館遂出武穆之族使公  
孫師爲司城公子朝卒使樂呂爲司寇以靖國  
人

萬曆丙辰夏吳興閔齊華  
閔齊伋閔象秦分次經傳

